

**ՀԵՂԱՓՈԽԱԿԱՆ ՇԱՐԺՈՒՄՆԵՐՆ ԱՐԵՎՄՏՅԱՆ ՀԱՅԱՍՏԱՆԻ
ՔԱՂԱՔՆԵՐՈՒՄ 1905—1908 ԹԹ.**

Ա. Ս. ՀԱՄԲԱՐՑԱՆ

XX դ. սկզբին սոցիալական ու ազգային հակասությունները թուրքիայում սրվելով հասան մեծ չափերի: Աշխատավոր զանգվածները գտնվում էին թե՛ ֆեոդալական, թե՛ կապիտալիստական և թե՛ գաղութային ճնշման տակ: Առավել ծանր էր ոչ թուրք ժողովուրդների գրոթյունը, որոնք սոցիալական հարստահարումների հետ միասին ենթարկվում էին նաև ազգային ու կրոնական ճնշման: Սուլթանական բռնապետությունը անտանելի էր դարձել նաև թուրքական երիտասարդ բուրժուազիայի համար, որը շուններ անձի ու գույքի ապահովություն և չէր կարողանում կապիտալիստական լայն գործունեություն ծավալել: Այդ բռնապետությունը անհամակրելի էր դարձել անգամ բուրժուական զարգացման ուղին բռնած կալվածատերերի և մանր պաշտոնյաների համար: Այսպիսով, համիդյան բռնակալության սոցիալական հենարանը խիստ նեղացել էր ու դարձել խախուտ: Առիթ էր հարկավոր սոցիալական ահեղ ցնցումների ու տիրակալի գահավիժման համար: Այդ առիթը եղավ ռուսական առաջին բուրժուա-դեմոկրատական հեղափոխությունը, որը մեծ ազդեցություն ունեցավ ինչպես Նվրոպայի, այնպես էլ Ասիայի մի շարք ժողովուրդների հեղափոխական պայքարի վերելքի վրա: Վ. Ի. Լենինը նշել է. «1905 թ. ռուսական շարժումից հետո դեմոկրատական հեղափոխությունն ընդգրկել է ողջ Ասիան՝ Թուրքիան, Պարսկաստանը, Չինաստանը, Աճում է խմորումն անգլիական Հնդկաստանում»¹:

Իմանալով Պետերբուրգի իրադարձությունների մասին, Արդուլ Համիդը ձեռնարկեց մի շարք միջոցառումներ, որպեսզի հեղափոխական տրամադրությունները Ռուսաստանից չթափանցեն Թուրքիա: Նրա անձնական քարտուղարի վկայությամբ, սուլթանը կորցրեց քունը, երբ իմացավ, որ «Իշխան Պոտյոմկին-Տավրիչեսկի» զրահանավթ կարմիր դրոշակ պարզած լողում է Սև ծովում: Համիդը կարգադրեց թույլ չտալ, որ «խռովարարները» մոտենան թուրքական ափերին, մանավանդ անցնեն Բոսֆոր-Դարդանեղի»²: Բայց հակառակ նրա ցանկության, ռուսական հեղափոխությունը ներթափանցում է Թուրքիա ու բռնակալության դեմ ոտքի հանում ճնշված ու կեղեքված զանգվածներին: Այն արագացրեց ու ակտիվացրեց ազատագրական շարժումներն ինչպես կայսրության այլ շրջաններում, այնպես էլ Արևմտյան Հայաստանում:

¹ Վ. Ի. Լենին, Երկեր, հ. 19, էջ 83:

² Ю. А. Петросян, Младотурецкое движение, М., 1971, стр. 271.

Դեռ 1905 թ. մարտին Բիթլիսի հայերը ըմբոստացան կառավարության սանձարձակ հարկային քաղաքականության դեմ ու կտրականապես մերժեցին իշխանությունների այն պահանջը, թե վիլայեթի շքավորների հարկերը պետք է վճարեն քաղաքի ունեւորները կամ բոլոր քաղաքացիները: Սակայն պաշտոնյաները ճնշեցին այդ շարժումը և հավաքեցին հարկերը³:

Նույն թվականի ապրիլին բիթլիսցիները ծառացան սննդամթերքների թանկության դեմ: Այսպես, օրինակ, մեկ կոտ ցորենի արժեքը 2,5—3 դուրուշից հասել էր 14—15 դուրուշի: Ժողովուրդը շարժվեց կառավարչատուն և պահանջեց անհապաղ իջեցնել սննդամթերքների գները: Կուսակալ Ֆերիզ բեյը պատճառաբանեց, որ գների աճը արդյունք է խստաշունչ ձմռան, որը կտրել էր քաղաքի կապը հացառատ շրջանների հետ և ապա դրույթունից դուրս գալու համար հայ վաճառականներից մեկին ստիպեց իր 4000 կոտ ցորենը վաճառել ցածր գներով: Այդուհանդերձ բնակչության դժգոհությունը գնալով աճեց: Փողոցներում, անգամ կուսակալի գրասենյակի պատերին երևացին խռուցիկներ, որոնցում ասված էր, որ սովը հայ գյուղացիության տնտեսական քայքայման արդյունք է՝ կառավարության հայակուլ քաղաքականության հետևանք: Թուրքիկներում նշվում էր, որ եթե իրավիճակն այդպես շարունակվի, ապա կուսակալը կսպանվի: Այնուհետև կոչ էր արվում քաղաքի բոլոր բնակիչներին՝ միասնաբար պայքարել կառավարության դեմ: 1905 թ. մայիսի 1-ին կանանց բազմությունը շարժվեց կառավարչատուն և պահանջեց անհապաղ կարգավորել պարենամթերքների գները: Ֆերիզ բեյը կամենալով իրենց տնտեսական դրույթյան բարելավման համար քաղաքի հայ և թուրք բնակչության մղած պայքարը վերածել ազգամիջյան կոիվների, անձամբ գնաց շուկա, բռնազրավեց հայերի հացը ու բաժանեց մահմեդականներին⁴, բայց նրա փորձը ապարդյուն անցավ:

Բիթլիսցիների հաջորդ ելույթը տեղի ունեցավ նույն թվականի հուլիսի 26-ին, երբ կառավարության պահանջով կուսակալը փորձեց հավաքել նոր հարկը⁵, որը պետք էր հավաքեր դեռ մարտին, բայց վախենալով ընդվզումներից, առժամանակ հետաձգել էր: Սակայն բիթլիսցիները կտրականապես հրաժարվեցին հարկ վճարել: Ֆերիզ բեյն այդ մասին ահազանգեց Կ. Պոլիս, որտեղից պահանջեցին ինչ գնով էլ լինի հավաքել հարկը: Ժողովուրդը նորից հրաժարվեց և փորձեց բողոքի բազմաթիվ հեռագրեր ուղարկել մայրաքաղաք, բայց կուսակալը կանխեց դա⁶:

Հեղափոխական ընդվզումները Բիթլիսում ավելի մեծ չափով ծավալվեցին 1907 թ. ամռանը: Դեռ մարտի 16-ին ժողովուրդը դժգոհելով կառավարության հարկային քաղաքականությունից և սննդամթերքների թանկացումից, ցանկացավ ցույցի դուրս գալ և զայրույթ հայտնել Ֆերիզ բեյին, որը ոչ միայն որևէ քայլ չէր կատարում բնակչության նյութական վիճակը բարելավելու համար, այլև պաշտոնի շարաշահումով ու կաշառակերությամբ ավելի էր ծան-

³ Ռուսաստանի արտաքին քաղաքականության արխիվ (այսուհետև՝ ՌԱՔԱ), ֆ. «Քաղաքային», 1905, ց. 482, գ. 539, թ. 49:

⁴ Նույն տեղում, թ. 79:

⁵ 1905 թ. կառավարությունը սահմանել էր, որ յուրաքանչյուր ծառայող, ներառյալ նաև պաշտոնյաներն ու զինվորականները, պարտավոր են ամեն ամիս պետությանը վճարել իրենց երեք օրվա աշխատավարձը:

⁶ ՌԱՔԱ, ֆ. «Քաղաքային», 1905, ց. 482, գ. 539, թթ. 138—140:

րացնում այն: Սակայն Լրկրաշարժը կանխեց դա: Ժողովուրդը փորձեց ցույցի դուրս դալ նույն թվականի ապրիլի 13-ին, բայց դա ևս կուսակալի հիվանդության պատճառով հետաձգվեց: Վերջապես՝ 1907 թ. հունիսի 9-ին 500 հոգի, դինված փայտերով ու երկաթներով, բռնեցին Ֆերիզ բեյին ու ծեծելով տարան կառավարչատուն: Այնուհետև նրանք հեռագրով կառավարությունից պահանջեցին ուղադրեն իրենց կուսակալին, այլապես կսպանեն նրան կամ կառաջացնեն «մեծ անկարգություն»⁷: Սակայն կառավարությունը Ֆերիզ բեյին ոչ միայն չպաշտոնազրկեց, այլև բիթլիսցիներին սպառնաց զինված ուժի գործադրմամբ: Մահմեդական հոգևորականները մասսաների ճնշման տակ, ինչպես նաև վախենալով դրկվել ժողովրդի մեջ ունեցած ազդեցությունից, հայտարարեցին, որ այդ դեպքում կկոչվեն զինվորների դեմ, միայն թե հասնեն Ֆերիզ բեյի պաշտոնազրկմանը: Ապստամբները երեք օր քաղաքը պահեցին իրենց ձեռքում: Հետագայում տարրերն այդ ընթացքում կրկին փորձեցին շարժումը վերածել հայկական կոտորածների, բայց վերստին անհաջողություն կրեցին: Այս ամենը ստիպեց սուլթանին 1907 թ. հունիսի 12-ին պաշտոնազրկել Ֆերիզ բեյին: Նոր կուսակալ Թահիր փաշան դրությունից դուրս գալու համար վարեց խորամանկ քաղաքականություն. ամեն մի դիմողի առաջարկում էր առժամանակ սպասել: Հետո կազմեց հանձնաժողով և հանձնարարեց «քննել» բողոքները: Ի վերջո պաշտպանելով քաղաքի վերնախավի շահերը, ժողովրդին լռեցրեց սպառնալիքներով⁸: «Վտակ» թերթը, խոսելով Բիթլիսի դեպքերի մասին, իրավացիորեն դրում է. «...ժողովուրդը մնաց նույն նախկին վիճակում, մերկ ու խեղճ: Ահա այս էր Բաղեշի կես ժողովրդական և շեյխական հեղափոխությունը»⁹:

Հեղափոխական շարժումները շուտով Բիթլիսից թափանցեցին Դիարբեքիր: Ժողովուրդն այստեղ սկզբում ծառացավ գուլքային և անձի անապահովության դեմ: 1905 թ. ամռանը դիարբեքիրցիները բողոքեցին Իբրահիմ փաշայի ոտնձգությունների դեմ: Տեղական իշխանությունները, սակայն, անուշադրության մատնեցին այդ բողոքը: Փաշան օգտվելով դրանից՝ ներխուժեց Դիարբեքիր, թալանեց բնակիչներին և ապա ավերեց շրջակա գյուղերը, որոնք պատկանում էին Դիարբեքիրում բնակվող կալվածատերերին: Նրանք, տուժելով Իբրահիմի ավաղակային հարձակումից և ձգտելով ժողովրդական զանգվածների ցասումն օգտագործել իրենց շահերի համար, ոտքի հանեցին քաղաքի բնակիչներին և նրանց առաջնորդեցին կուսակալ Աթա բեյի բնակարանը ու պահանջեցին պատժել ոճրագործին: Սակայն տեսնելով, որ կուսակալը չի ունենդրում իրենց, գրավեցին քաղաքի հեռագրատունը և հեռագրեցին մայրաքաղաք՝ պահանջելով պատասխանատվության կանչել Իբրահիմ փաշային և քաղաքում ու նրա շրջակայքում կարգ ու կանոն հաստատել: Կ. Պոլսից առաջարկեցին ցրվել՝ խոստանալով քննել Իբրահիմ փաշայի վարքագիծը: Ամիսներ հետո Դիարբեքիր ժամանած հանձնաժողովը գործնական ոչինչ չարեց և հեռացավ քաղաքից, ժողովրդին խաբելով, թե Իբրահիմ փաշայի գործը կքննվի Հալեպում:

⁷ Նույն տեղում, գ. 541, թ. 113:

⁸ Նույն տեղում, թթ. 113—142:

⁹ «Վտակ», 1908, № 32:

Անպատիժ մնացած Իբրահիմ փաշան 1907 թ. վերսկսեց իր ասպատակությունները և կրկին կողոպտեց Դիարբեքի ռուս շրջակա գյուղերը: Դրանից վրդովված դիարբեքիցիները հոկտեմբերին նորից ոտքի ելան, շրջապատեցին կառավարչատունը և պահանջեցին անհապաղ դատել Իբրահիմ փաշային: Կուսակալն իմանալով, որ Իբրահիմը հովանավորվում է սուլթանի կողմից, կաշառում է նրան և դրանով ազատվում իր բազմաթիվ եղեռնագործությունների համար արժանի հատուցումից¹⁰ և զգալով, որ անգոր է ճնշել ժողովրդական պոթիկումը, հիվանդ ձեռքով, կնիքը հանձնեց ամբոխին ու հայտարարեց. «Ինչ կուզեք ըրեք, գիս հանգիստ ձգեք, ես հիվանդ եմ»¹¹: Վերցնելով կնիքը, ժողովուրդը նոյեմբերի 16—20-ը բողոքի 15 հեռագիր ուղարկեց Կ. Պոլիս, բայց պատասխան չստացավ: Հեռագրերի տակ մահմեդականների հետ միասին ստորագրում էին նաև քրիստոնյաները: Տեսնելով կառավարության անտարբերությունը, ժողովուրդը գրավեց նաև երկրագործական բանկը, պետական գանձարանը և նույնիսկ զինապահեստը: Լսելով այդ մասին, նոյեմբերի 27-ին մայրաքաղաքից պատասխանեցին, որ Իբրահիմ փաշան դատվելու նպատակով կանչված է Հալեպ, Դիարբեքիցիները չգոհանալով կառավարության այդ պատասխանով, նոյեմբերի 28-ին նոր հեռագիր ուղարկեցին Կ. Պոլիս և պահանջեցին անպայման պատժել Իբրահիմին, իսկ Աթա բեյին հեռացնել կուսակալի պաշտոնից: Կառավարությունը ստիպված կատարեց ալեկոծված զանգվածների պահանջը: Մայրաքաղաքից հայտնեցին, որ կուսակալն արդեն պաշտոնազրկվել է և նրա փոխարեն նշանակվել է Մոսուլի վալի Հասան փաշան, իսկ Իբրահիմը կանչված է Հալեպ՝ դատվելու: Բացի այդ, կառավարությունն առաջարկում էր դիարբեքիցիներին դադարեցնել ցույցերը և ցրվել:

Քաղաքի վերնախավը բավարարվեց այդ պատասխանով և երկյուղ կրելով պաշարի խորացումից ու ծավալումից, ժողովրդին առաջարկեց ցրվել: Հետադիմական տարրերն իրենց հերթին ձգտում էին շարժումն ուղղել հայերի դեմ: Վիլայեթի զինվորական ղեկավարությունը քաղաքի հայկական թաղամասերում կենտրոնացրեց 27.000 զինվոր, որոնք շարժումը կրկնվելու դեպքում սկսելու էին հայկական կոտորածները: Սակայն այդ ամենը տեղի չունեցավ, քանզի բնակչության ճնշող մեծամասնության պայքարն ուղղված էր ընդհանուր անապահովության դեմ:

1908 թ. սկզբներին Դիարբեքի ծայր առավ ժողովրդական նոր շարժում՝ ուղղված կառավարության հարկային քաղաքականության դեմ: Շարժման մասնակիցները համարյա բացառապես մահմեդականներ էին, իսկ հայերը զգուշացնելով, որ իշխանությունները կարող են հուզումների մեջ մեղադրել իրենց, չեզոք մնացին: Ժողովուրդը հեռագրեց՝ մայրաքաղաք, պահանջելով իջեցնել հին հարկերը, իսկ նորը չսահմանել, որովհետև անկարող են վճարել: Մարտի վերջին նրանց միացան նաև Օսմանյան բանակի կապալառուները (գոնթորաչիները) և պահանջեցին պետությանը տրամադրած իրենց գրամը: Կառավարությունը շարժումը ջլատելու նպատակով կատարեց կապալառուների պահանջը, իսկ ժողովրդական զանգվածներին պատժեց¹²:

¹⁰ В. А. Гордлевский, Избранные сочинения, т. III, М., 1962, стр. 116.

¹¹ «Դրոշակ», 1908, № 1, էջ 10:

¹² «Վտակ», 1908, № 47, 73:

Հեղափոխական դեպքերն ավելի ցայտուն արտահայտվեցին էրզրումում։ Սուլթանի ներքին քաղաքականությունից դժգոհ մահմեդական վաճառականներն ու կապալառուները դեռևս 1906 թ. սկզբներին ստեղծեցին «Ջան-վերիր» («Հոգի տվող») կազմակերպությունը և իրենց ձեռքը վերցրեցին քաղաքի բնակչության տարերային հուզումների ղեկավարությունը։ Շուտով սրանց հարեցին նաև որոշ պաշտոնյաներ և անգամ ժանդարմներ, որոնք երկար ժամանակ աշխատավարձ չէին ստացել։ Մարտի 5-ին շանվերիրները ալեկոծված զանգվածներին առաջնորդեցին դեպի էրզրումի կուսակալ Նազիմ փաշայի բնակարանը և կազմակերպեցին մանիֆեստացիա։ Քաղաքի կալաղորապետը, որ Նազիմ փաշայի տանն էր, ռազմական ուժի գործադրման սպառնալիքով ցուցարարներին առաջարկեց ցրվել, սակայն վերջիններս հեգնեցին նրան։ Տեսնելով դրությունը լրջությունը, Նազիմ փաշան ցուցարարներին առաջարկեց ներկայացուցիչների միջոցով հայտնել իրենց պահանջները։ Ցուցարարները կուսակալին առաջարկեցին անհապաղ փոխել քաղաքագլխին, պաշտոնադրել իրենց դիրքը չարաշահող մի շարք անձանց և թեթևացնել հարկային բեռը։ Նազիմ փաշան խոստացավ այդ պահանջների մասին հաղորդել մայրաքաղաք, բայց դա չբավարարեց ժողովրդին։ Մարտի 6-ին Նազիմ փաշայի տան առաջ ավելի հոծ բազմություն հավաքվեց (շուրջ 20.000 մարդ)։ Դրությունից դուրս գալու համար կուսակալը խոստացավ կատարել ամբոխի պահանջը, բացի հարկերի թեթևացումից, որի համար պետք է ստանար կառավարության թույլտվությունը։ Ժողովուրդը հուսալով, որ կուսակալի խոսքին կհետևի գործը, ցրվեց¹³։ Բայց մարտի 8-ին, երբ լուր տարածվեց, որ Նազիմ փաշան խաբել է, շանվերիրները հեռագրեցին կառավարությանը և եղած պահանջներին ավելացրին նաև կուսակալի վտարումը՝ սպառնալով ապստամբությամբ։ Մարտի 12-ին Նազիմ փաշան հրապարակեց մեծ վեճի մասին պատասխանը, որը հայտնում էր, թե կառավարության հարկային քաղաքականությունը ընդհանուր է ողջ կայսրության համար և էրզրումը չի կարող բացառություն կազմել։ Այս սպառնալով, որ «կանգ չի առնի արյունահեղության առաջ»¹⁴, ցուցարարներին առաջարկեց ցրվել ու տպավորություն ստեղծելու համար ձեռքարկեց երկու սպայի՝ որպես խռովության կազմակերպիչների, և քաղաքի փողոցներում նշանակեց զինվորական պարեկներ։

Ջայրացած կառավարության այդ վարքագծից, ժողովուրդը մարտի 15-ին նորից գրավեց հեռագրատունը, կտրեց կուսակալի կապը հեռագրատան հետ և նոր հեռագիր ուղարկեց մայրաքաղաք։ Մարտի 16-ին Նազիմ փաշան զորք հանեց ժողովրդի դեմ, բայց զինվորները հրաժարվեցին կրակել։

Կառավարությունն իմանալով իրադրության բարդացման մասին, թուրքական բանակի IV կորպուսի մուշիր Ջաքբի փաշային առաջարկեց մեկնել էրզրում և հանգստացնել ժողովրդին։ Սակայն շանվերիրները, որոնք մարտի 16-ից քաղաքը վերցրել էին իրենց ձեռքը¹⁵, բնակչության պաշտպանությունն ստանալու համար կոչ արեցին՝ չվճարել նոր հարկը։ Մարտի 17-ին Նազիմ փաշան, փորձելով իշխանությունը հտնվածել շանվերիրներից, հայտարարեց,

¹³ ՌԱՔԱ, ֆ. «Քաղաքիկ», 1906, գ. 1642, թթ. 25—28։

¹⁴ Նույն տողում, թ. 31։

¹⁵ Վրացական ՍՍՀ կենտրոնական պետական պատմական արխիվ (այսուհետև՝ ՎՍՍՀ ԿՊՊԱ), ֆ. 71, գ. 7, թթ. 51—53։

թե նոր հարկի գանձումն առայժմ հետաձգվում է և էրզրումցիներին առաջարկեց դադարեցնել ցույցերն ու ցրվել: Սակայն նրա փորձն ապարդյուն անցավ: Մարտի 18-ին ընդվզումները քաղաքում ավելի բորբոքվեցին, երբ ջանվերի-նեբը Ջաքթի վաջային սպասող բազմությունը հայտարարեցին, թե նա չի գալու և որ նրա գալստյան մասին լուրը տարածել է կուսակալը, որպեսզի հանգըստացնի ալեկոծված գանգավածներին ու հաշվեհարդար տեսնի նրանց հետ: Ժողովուրդը վերստին հեռագիր ուղարկեց շեյխ ուլ-իսլամին: Հաջորդ օրը ստացվեց Ջաքթի փաշայի պատասխանը, որով հայտնվում էր, թե կուսակալն արդեն պաշտոնազրկված է, բայց ինքը հիվանդության պատճառով դեռ չի կարող ժամանել էրզրում և իր ֆունկցիաների կատարումը ժամանակավորապես դնում է քաղաքի կայազորապետ Մունիր փաշայի վրա:

Ժողովուրդը դա համարելով իր հաղթանակի առաջին արգասիքը և հուսալով, թե դրան կհետևի հարկային բեռի թեթևացումը, ցրվեց: Բայց մարտի 20-ին, երբ լուր տարածվեց, թե Ջաքթի փաշայի պատասխանը հորինված է, էրզրումցիները կրկին ալեկոծվեցին ու շրջապատեցին հեռագրատունը: Նրանք ավելի բորբոքվեցին, երբ լսեցին, թե Նազիմ փաշան հայտնել է կառավարությանը, որ նոր տուրքից խուսափում են միայն հարուստները, իսկ հասարակ մարդիկ անխռով վճարում են այն, թե կուսակալը նույնիսկ այդ առթիվ ստորագրություններ է ուղարկել մայրաքաղաք, որոնց հիման վրա վերևից կարգադրել են գանձել նոր հարկը, իսկ դիմադրողներին՝ պատժել: Մարտի 21-ին ժողովուրդը նոր հեռագիր ուղարկեց սուլթանին՝ պահանջելով անհապաղ պաշտոնազրկել Նազիմ փաշային: Սուլթանն ի վերջո հարկադրված եղավ հաշվի նստել ժողովրդի հետ և մարտի 22-ին կարգադրեց էրզրումի կուսակալին տեղափոխել Դիարբեքիր և՝ հակառակը:

Մինչ կատարվում էր վալիների փոխանակում, քաղաքն իրենց ձեռքը վերցրած ջանվերիներն անցկացրին մի շարք միջոցառումներ: Նրանք պաշտոնազրկեցին հեռագրատան պետին, քաղաքական ու քրեական դատարանների նախագահներին և այլ պաշտոնյաների: Ապա մշակեցին իրենց պահանջները, որոնց համաձայն անհրաժեշտ է վերացնել նոր հարկը, վճարել պաշտոնյաների ու զինվորականների աշխատավարձը, անդորրագրի տալ կապալառուներին՝ նրանցից պարտք վերցնելու դեպքում, սահմանել խիստ վերահսկողություն վիլայեթի իշխանությունների գործունեության, հատկապես ֆինանսների վրա, իջեցնել հայերից գանձվող բեղելի-ասկերի հարկը, ցրել համիդեական զնդերը և այլն: Ջանվերիներն այս պահանջներն ուղարկեցին դեռ քաղաք չմտած նոր կուսակալին և սպառնացին նոր ելույթներով, եթե դրանք չկատարվեն¹⁶:

1906 թ. մարտի 25-ին էրզրումի նախկին կուսակալ Նազիմ փաշան քաղաքից հեռացավ, իսկ նոր կուսակալ Շեվքեթ փաշան նույն ամսի 28-ին ժամանեց էրզրում: Ապրիլի 16-ին մայրաքաղաքից հանձնաժողով եկավ էրզրում՝ մարտյան դեպքերը քննելու համար: Այն նստեց զորանոցում և հարցաքննության կանչեց մի խումբ հարուստ մահմեդականների: Բայց սրանք հրաժարվեցին ներկայանալ, պատճառաբանելով, որ հանձնաժողովն ըստ էության ռազմական հետաքննություն է զբաղվում, իսկ իրենք զինվորականներ

¹⁶ ՌԱՔԱ, ֆ. «Քաղաքիկ», 1906, ց. 482, գ. 1642, թ. 60:

չեն: Ապրիլի 18-ին հանձնաժողովը ստիպված զորանոցից տեղափոխվեց քաղաք և հաստատվեց կառավարչատանը: Այն հարցաքննությունն այնպես էր վարում, որ մարտյան դեպքերը կապվեին հայերի հետ ու այդ հիման վրա «անձագերծվելու» հայկական նոր սպանդ¹⁷: Սակայն շարժմանը մասնակցած մահմեդականները հայտարարեցին, որ գործել են ինքնուրույն, իսկ հայերը հետևել են իրենց: Հանձնաժողովը, չհասնելով իր նպատակին, մայիսի 3-ին մեկնեց Կ. Պոլիս:

1906 թ. աշնանը համիդյան կառավարությունը փորձեց հարձակման անցնել էրզրումի հեղափոխական ուժերի դեմ: Հոկտեմբերի 10-ի գիշերը իշխանությունները ձերբակալեցին ու քաղաքից արտաքսեցին վիլայեթի մյուսֆթիին և ջանվերիների հինգ ղեկավարների: Բայց կառավարության այդ քայլը հանդիպեց էրզրումցիների համառ դիմադրությանը: Հոկտեմբերի 11-ին ժողովուրդը սպանեց ավագ ոստիկանապետին: Երբ սպանվածի գրպանում հայտնաբերվեց աքսորի ենթակա 60 հոգու ցուցակ, ժողովուրդը սպանեց նաև նրա որդուն: Բազմությունը, այնուհետև, սկսեց փնտրել ժանդարմապետ Ալայ բեյին, բայց չգտնելով, շարժվեց դեպի կուսակալի բնակարանը, կոտրեց դիմարների դիմադրությունը, որսաց սարսափահար դեռ ու դեն փախչող Շեվքեթ փաշային, դադանակի հարվածներով վիրավորեց գլուխը և քարշ տվեց դեպի մզկիթ: Այստեղ նրան սպառնալիքով առաջարկեցին անհապաղ ետ բերել աքսորվածներին: Թեպետև կուսակալը կատարեց նրանց պահանջը, բայց նրան պահեցին մզկիթում այնքան ժամանակ, քանի գեռ աքսորյալները չէին վերադարձել: Երբ Շեվքեթ փաշան մզկիթում բանտարկված էր, լսում էր թե ինչպես ամբոխը դրսից գոռում էր. «Վալի փաշա, եթե աքսորյալները մինչև երեկո չգան, քեզ էլ սեր-քոմիսերի (ոստիկանապետի— Ա. Հ.) պես սատկեցնելու ենք»¹⁸: Բազմությունը կուսակալին ազատեց հոկտեմբերի 12-ին, երբ բոլոր աքսորյալները վերադարձել էին:

Կառավարությունը էրզրումցիների հուզումները մեղմելու նպատակով պաշտոնազրկեց Շեվքեթ փաշային, նրա փոխարեն նշանակեց խարբերդի կուսակալ Նուրի բեյին և ապա հայկական նոր ջարդ կազմակերպելու նպատակով լուր տարածեց, թե իբր հայերը ներխուժել են մզկիթը և անարգել: Բայց ժողովրդական զանգվածները չեն թարկվեցին այդ պրոպագանդային, մանավանդ, երբ ստուգեցին ու տեսան, որ լուրը սուտ է:

Նոր կուսակալ Նուրի բեյը 1906 թ. նոյեմբերի 15-ին իր մոտ կանչեց մյուսֆթիին և առաջարկեց՝ համոզել ժողովուրդին, որ նա վճարի նոր հարկը: Սակայն մյուսֆթին հայտարարեց, որ դա չի մտնում իր պարտականությունների մեջ: Կուսակալը նույն առաջարկությամբ դիմեց ջանվերիների ղեկավարներին, որոնք պատասխանեցին, թե ժողովուրդն անկարող է այդ անել: Նոյեմբերի վերջերին Նուրի բեյը կրկնեց իր առաջարկը և ջանվերիներից պահանջեց նաև հրապարակորեն հայտարարել, որ իրենք սխալվել են՝ կազմակերպելով հակակառավարական ցույցեր: Կուսակալը սպառնաց, որ հակառակ դեպքում նախկին աքսորյալները կրկին կվտարվեն քաղաքից: Սակայն նրա սպառնալիքները տվեցին հակառակ արդյունք: Էրզրումցիները դեկտեմբերին դուրս եկան նոր ցույցերի ու հեռագիր հղեցին սուլթանին: Պատասխան

17 ՎՍՍՀ ԿՊՊԱ, ֆ. 71, դ. 7, թթ. 106—108:

18 «Դրոշակ», 1906, № 11, էջ 165:

չստանալով, ջանվեցին Կոմիտեն 1907 թ. հունվարին հրապարակեց երկու կողմի մեկը ժողովրդին, իսկ մյուսը՝ զինվորներին: Առաջինում քարոզվում էր համերաշխություն, միասնություն, համատեղ պայքարի հաստատակամություն, պառլամենտի հրավիրում, 1876 թ. սահմանադրության վերականգնում, երկրի դուրս բերում օտարերկրյա կախումից ու ստրկացումից, իսկ երկրորդում բացատրվում էր զինվորներին, որ նրանց ծանր կացությունը կառավարության քաղաքականության արդյունք է: Կոմիտեն զինվորներին կոչ էր անում պաշտպանել ոչ թե իշխանություններին, այլ ժողովրդին, չկրակել իրենց հայրերի, մայրերի, եղբայրների ու քույրերի վրա, քանզի նրանք պայքարում են նաև իրենց բախտավորության համար¹⁹:

Էրզրումցիների համառ ու համերաշխ պայքարը վերջապես տվեց իր արդյունքը: 1907 թ. մարտին կառավարությունը ստիպված եղավ վերացնել մահմեդականների անձնական հարկն ու անասնահարկը, իսկ քրիստոնյաների՝ բեգելի-ասկերին²⁰: Քաղաքի վերնախավը բավարարվեց դրանով ու անցավ կառավարության կողմը, բայց ներքնախավը պահանջեց նաև դեմոկրատական այլ միջոցառումներ: Այսպիսով՝ շարժման մասնակիցների միասնական ճակատը ճեղքվեց: Այն ավելի խորացավ, երբ ունեւոր մահմեդականները փորձեցին ավելի սեղմել քրիստոնյաների իրավունքները, պահանջելով նրանց դատարանների վերացում և փոխարինում մահմեդական ընդհանուր դատարանով՝ շարիաթով²¹:

1907 թ. օգոստոսին էրզրումում կրկին հեղափոխական ընդվզումներ բռնկվեցին: Դա հետևանք էր այն բանի, որ մահմեդական ու քրիստոնյա հացավաճառները, օգտվելով տիրող սովից, կրկնապատկեցին ցորենի գինը, նրա մի կոտր վաճառելով 50 փարայով: Ժողովուրդը հացավաճառներից պահանջեց ցորենը վաճառել նախկին գնով, բայց մերժում ստանալով, օգոստոսի 25-ին նույն առաջարկությամբ դիմեց կուսակալին: Երբ նուրի բեյը պատասխանեց, թե դա չի մտնում իր պարտականությունների մեջ, ամբոխը սկսեց հաշվեհարդար տեսնել հացավաճառների հետ, սպանելով հայ բողոքական Գրիգոր Օհանյանին և թուրք Մուստաֆա էֆենդուն: Նրանցից առաջինի դիակը նետվեց լուսավորչական հայերի գերեզմանոց, իսկ երկրորդին՝ աղբանոց: Այնուհետև սկսվեց հացավաճառների ունեցվածքի թալանը: Հատկանշական է, որ զինվորներն ու ոստիկանները այդ իրադարձություններին չմիջամեջին: Ժողովրդական ցասումից սարսափած հացավաճառները ստիպված եղան մեկ կոտ ցորենը այժմ վաճառել 30 փարայով²²:

1907 թ. աշնանը քաղաքում հուզումները դադարեցին: Նոյեմբերի 18-ին էրզրումի ռուսական գլխավոր հյուպատոս Ն. Սկրյաբինը հաղորդում էր, որ այնտեղ բնակչության «հուզումները կարելի է համարել դադարած»²³: Սուլթան Աբդուլ Համիդը սկսեց հաշվեհարդար տեսնել էրզրումի հեղափոխական զանգվածների հետ: Կիրառվեցին մասսայական ձերբակալություններ ու հետադնդումներ: Բանտ նետվեցին հուզումների բազմաթիվ մասնակիցներ: Դեկ-

19 ՌԱՔԱ, ֆ. «Քաղաքիկի», գ. 1643, թթ. 5—6:

20 Նույն տեղում, թ. 56:

21 Նույն տեղում, թ. 86:

22 Վրացական ՍՍՀ ԿԳՊԱ, ֆ. 521, ց. 9, գ. 8, թթ. 22—25, «Մշակ», 1907, № 134—135:

23 ՌԱՔԱ, ֆ. «Քաղաքիկի», 1907, գ. 1643, Թ. 274:

տեմբերի 2-ին կալանավորների թիվը հասավ 112-ի: Մայր առան մատնությունները: Հարցաքննության կանչվեցին նաև զինվորականներ, պաշտոնյաներ, ուսուցիչներ, լրագրողներ, անգամ սովորողներ: Հարցաքննության ժամանակ նրանց ծեծում էին, գցում մութ ու խոնավ նկուղները, օրերով քաղցած կամ ծարավ էին թողնում ու ենթարկում այլ զրկանքների:

Կաշառք կորզելու նպատակով իշխանության ներկայացուցիչները մեղադրանքներ էին ներկայացնում քաղաքի հարուստներին և իրենց նպատակին հասնելով՝ մեղմում վճիռը կամ ազատ արձակում: Էրզրումի վերնախավը ոչինչ չէր խնայում իր կամ հարազատների փրկության համար: Այսպես, օրինակ, քաղաքի հարուստներից մեկը՝ Իզզեթ բեյը, որդուն ազատելու համար ոստիկանապետին «նվիրեց» շուրջ 8.000 լիրա: Կաշառակերության շնորհիվ համիդյան պաշտոնյաները, ինչպես նշում էր ականատեսը, հարստանում էին «ոչ թե օրերով, այլ ժամերով»²⁴, Համիդյան հետապնդումներն ու ձերբակալությունները շարունակվեցին նաև 1908 թ. սկզբներին: Միայն հունվարի առաջին օրերին իշխանությունները բանտարկեցին 50 մարդու: Հունվարի 28-ին քաղաքի քրեական դատարանը, վերջապես, լսեց 99 ձերբակալվածների գործը և նրանցից 8-ին դատապարտեց մահապատժի, 68-ին՝ տարբեր ժամկետներով բանտարկության, իսկ 23-ին ազատեց՝ որպես անմեղների ու անչափահասների²⁵, Համիդյան այդ բռնությունները, սակայն, չկարողացան խեղդել երկրում աճող հեղափոխական շարժումները:

Վանում հեղափոխական ընդվզումները ծավալվեցին 1906 թ. գարնանը: Քաղաքի փողոցներում ու հրապարակում երևացին թուցիկներ, որոնք կոչ էին անում մահմեդականներին՝ թողնել հակահայկական տրամադրությունները և պաշարի սլաքն ուղղել ընդդեմ կառավարության: Թուցիկներից մեկում ասվում էր. «Մենք, իսլամներս, մինչև հիմա հանցավոր կհամարեինք հայ հեղափոխականները՝ ճանաչելով զանոնք իբրև խռովարարներ: Բայց մենք մինչև այժմ կուրորեն ենթարկված լինելով կառավարության հարստահարությանց ու ճնշումներուն, կկարծեինք, թե արդեն այս էր մեր ճակատագիրը՝ որուն մինչև վերջ պարտավոր ենք հնազանդիլ: Իսկ այժմ բացված են մեր մտքերն ու աչքերը, և մենք ալ ենթարկվելով հայերու վիճակին ու բախտին, կձայնակցենք անոնց բողոքներուն ու կազդարարենք, որ վերացնենք այս խիստ ճնշումները ու հարստահարությունները, որոնք այլևս անտանելի են մեզ համար: Անուղղակի տուրքերը, դատարանական զեղծումները, կաշառակերություններն ու ամբողջ պաշտոնական խալտառակությունները մեր ժողովուրդը ծայր աստիճան թշվառության ու հետամնացության մատնեցին՝ որոնց այլևս չենք կարող դիմանալ: Այո կամ ոչ պատասխան»²⁶,

Ոստիկանները պոկում էին թուցիկները, հավաքում ու ոչնչացնում դրանք, ձերբակալում էին կասկածելիներին ու բանտ նետում: Այնուհետև տեղական իշխանությունները ցանկանալով ողջակիզել «խռովարարներին» ու արմատախիլ անել հեղափոխական շարժումները, 1906 թ. հունիսի 1-ին հրդեհեցին բանտը: Այդ քայլն ավելի բորբոքեց ժողովրդի ցասումը և նոր ընդվզումների առիթ տվեց: Քաղաքի բնակիչները դուրս եկան ցույցի և պահանջ-

²⁴ Նույն տեղում, թ. 285, ֆ. Ե4. Պոլսի դեսպանությունը, 1907, ց. 482, գ. 2675, թ. 299:

²⁵ Նույն տեղում, ֆ. Ե4. Պոլսի դեսպանությունը, 1908, գ. 2676, թթ. 16—17:

²⁶ «Հնչակ», 1906, № 6, էջ 54:

ջեցին՝ վերջ դնել ձերբակալվածների նկատմամբ կիրառվող բարբարոսություններին: Համառ պայքարով նրանք հասան այն բանին, որ իշխանությունները պաշտոնադրկեցին երկու անձանց, դադարեցրին վայրագությունները և թույլատրեցին վանեցիներին՝ այցելել բանտարկված հարազատներին:

1907 թ. քաղաքում տեղի ունեցավ հայ բնակչության նշանավոր ելույթը: Հունվարի 29-ին նրանք դիմեցին Կ. Պոլսի պատրիարքին՝ խնդրելով միջնորդել կառավարության առաջ՝ մեղմել հարկային քաղաքականությունը: Պատասխան չստանալով, վանի հայոց քաղաքական ժողովը փետրվարի 12-ին հրապարակեց տվեց: Բայց իշխանությունները ոչ միայն հաշվի չնստեցին այդ փաստի հետ, այլև ավելի խստացրին հարկահանումը: Մթնոլորտը շիկացավ: Կուսակալ Ալայ-բեյը, վախենալով վանեցիների վրիժառությունից, փողոց էր դուրս գալիս ոստիկանների ու զինվորների ուղեկցությամբ: Կառավարությունը, փորձելով խուսափել դեպքերի հետագա բարդացումից, 1907 թ. սեպտեմբերին պաշտոնադրկեց Ալայ-բեյին: Նա թողեց վանը և ուզում էր Անդրկովկասի վրայով մեկնել Կ. Պոլիս, բայց Բաթումում սպանվեց²⁷:

Դեռ չէին վերջացել հակակառավարական ընդվզումները, երբ վանի մի շարք արհեստանոցներում բռնկվեց բանվորների ու աշակերտների շարժումն իրենց տներին դեմ: 1907 թ. հոկտեմբերին կահույքագործները գործադուլ հայտարարելով պահանջեցին աշխատավարձի բարձրացում և դժբախտ պատահարների դեպքում փոխհատուցում: Նրանք արհամարհում էին տների կամ վարպետների սպառնալիքները, թե գործի շանցնողները կզրկվեն աշխատանքից, իսկ իրենց դավաճան ընկերներին ենթարկում էին հրապարակային նախատինքի, անգամ ծեծի²⁸: Ցավոք մեզ անհայտ է, թե ինչպես վերջացավ կահույքագործների պայքարը:

Համարյա այդ նույն ժամանակաշրջանում վանում գործադուլ հայտարարեցին նաև կոշկակարները, որոնք նույնպես պայքարում էին իրենց տնտեսական դրության բարելավման համար: Համառ պայքարի շնորհիվ, կոշկակարները ձեռք բերեցին մի շարք նվաճումներ (կրկնապատկվեց նրանց աշխատավարձը, կրճատվեց աշխատանքի տևողությունը, նշանակվեց վարձատրություն նաև այն դեպքերում, երբ գործավորները պարապ էին մնում տների պատճառով): 1907 թ. դեկտեմբերի 22-ին «Վտակը» խոսելով վանի քաղաքական անցուղարձերի մասին, գրում էր. «տնտեսական սուղ դրությունը պատճառ եղավ առաջ բերելու աշակերտական-բանվորական շարժում մը մի քանի արհեստների մեջ: Գունտուրաչիների միությունը առաջինն էր իր տեսակի մեջ, որ շնայած իր անդամների սակավության... տարավ հաղթանակ՝ մի բավական երկար գործադուլով... ողջ քաղաքը կարծես քնից նոր զարթնող մարդու կնիքներ: Ամեն ոք կաճապարի առաջ ընթանալ և խել իր իրավունքները»²⁹:

1905—1908 թթ. հեղափոխական շարժումներ տեղի ունեցան նաև Արևմտյան Հայաստանի մյուս մեծ քաղաքներում: 1906 թ. սկզբներին Սվադի բնակիչները ծառացան կառավարության հարկային քաղաքականության, իսկ Խարբերդում՝ կապիտալիստական շահագործման դեմ: Սվազիները ստիպե-

27 ՌԱՔԱ, ֆ. «Քաղաքիկ», 1907, ց. 482, գ. 715, թթ. 6—7:

28 «Մշակ», 1907, № 148:

29 «Վտակ», 1908, № 21:

ցին կառավարութեանը վերացնել նոր հարկը³⁰, իսկ խարբերդցիները հարկադրեցին ձեռնարկատերերին՝ բարձրացնել բանվորների աշխատավարձը³¹:

Արևմտյան Հայաստանի մեծ քաղաքների օրինակով պայքարի դուրս եկան նաև փոքր քաղաքներն ու գյուղաքաղաքները: Կյուրինում 1907 թ. գործադուլ հայտարարեցին շուրջ 2000 կտավագործներ և պահանջեցին բարելավել իրենց տնտեսական վիճակը: Երբ պայքարն ընդունեց համառ բնույթ, գործին միջամտեց քաղաքապետի տեղակալը: Բայց սա, բախվելով գործադուլավորների անհաճանք դիրքերին, հարկադրված եղավ առաջարկել ձեռնարկատեր-վաճառականներին՝ կատարել որոշ զիջումներ: Գործադուլավորներին համակրող ականատեսն այդ օրերին նշում էր, որ քաղաքապետի տեղակալը աշխատում է գործին վախճան մը տալ և կհուսանք ի մոտո վայելել պտուղը³²:

Այդպիսով, 1905—1908 թթ. Արևմտյան Հայաստանի քաղաքներում տեղի ունեցած հեղափոխական ելույթների շարժիչ ուժերը աշխատավոր զանգվածներն էին, իսկ ղեկավարը՝ բուրժուազիան: Նրանցից յուրաքանչյուրն ուներ իր նպատակները. օգտագործելով մասսաների պայքարը, բուրժուազիան ձգտում էր հասնել որոշ զիջումների և այնուհետև գործարքի մեջ մտնել սուլթանի հետ, բայց աշխատավոր զանգվածները ջանում էին ձեռք բերել ավելի մեծ արդյունքներ:

Շարժման մասնակցում էին և՛ մահմեդականները, և՛ քրիստոնյաները: Սակայն ավելի ակտիվ դեր էին խաղում մահմեդականները, իսկ քրիստոնյաները, այսինքն՝ հայերը 1890-ական թվականներին ենթարկվելով մասսայական կոտորածների և այնուհետև գտնվելով դամոկլյան սրի տակ, խուսափում էին կանգնել շարժման ավանգարդում, զգուշանալով, թե առիթ կտան կազմակերպելու հայկական նոր ջարդեր: Բայց այդուհանդերձ նրանք ևս նշանակալից դեր խաղացին հեղափոխական շարժումների մեջ:

Հատկանշական է, որ հակառակ կառավարութեան ցանկություններին ու ձգտումներին, քաղաքների մահմեդական ու քրիստոնյա բնակիչները պայքարի ընթացքում շատ հաճախ ցուցաբերում էին համերաշխություն ու համագործակցություն և մերժում էին իշխանությունների փորձերը՝ ազատագրական պատերազմը ազգամիջյան զգվռտոցների վերածելու ուղղությամբ:

Արևմտյան Հայաստանի հեղափոխական ընդվզումները կտրված էին միմյանցից, առաջանում էին գերազանցապես տնտեսական դրդապատճառներով և ընթանում տարբերայնորեն: Սակայն որոշ դեպքերում շարժման մասնակիցները առաջ էին քաշում նաև քաղաքական խնդիրներ, պահանջելով 1876 թ. սահմանադրության կենսագործումը և դեմոկրատական այլ միջոցառումներ:

Իրենց բոլոր թերություններով հանդերձ, Արևմտյան Հայաստանի քաղաքային բնակչության ելույթները պետք է համարել առաջադիմական լուրջ քայլ: Կազմելով Թուրքիայում ծավալված սոցիալ-տնտեսական ու ազգային-ազատագրական պայքարի բաղկացուցիչ մասը, նրանք խաբխում էին սուլթանական բռնապետության հիմքերը և արագացնում նրա կործանումը:

30 Վրացական ՍՍՀ ՊԿՊԱ, ֆ. 71, գ. 7, թ. 60:

31 Վ. հ. Զ. Կ. Կ., Խարբերդը և նրա ոսկեդեն դաշտը («Հռոմաթույան պատմական, մշակութային և ազգագրական»), Նյու-Յորք, 1939, էջ 616—617:

32 «Երկրի Ասյան», 1907, № 70, էջ 4—5:

РЕВОЛЮЦИОННОЕ ДВИЖЕНИЕ В ГОРОДАХ ЗАПАДНОЙ АРМЕНИИ В 1905—1908 гг.

А. С. АМБАРЯН

Резюме

Первая русская буржуазно-демократическая революция оказала значительное влияние на развитие освободительного движения угнетенных народов многих стран, в том числе и Турции. Под непосредственным воздействием этой революции вспыхнуло народное движение и в городах Западной Армении. В 1905—1908 гг. в Эрзеруме, Диарбекире, Ване, Битлисе, Харпуте, Сивасе и в других городах магометанское и христианское население совместно выступило против султана. Попытки турецкого правительства превратить освободительную борьбу городского населения Западной Армении в межнациональную резню не увенчались успехом. Выступления городского населения Западной Армении, будучи органической частью революционного движения в Турции, способствовали низложению в 1908 г. гамидовской тирании.